

Date – 21/03/2026

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

- 1. Mizoram State Election Commission thuchhuakin a tarlan danin, Aizawl Municipal Corporation inthlanna neih turah candidate pakhat-in ward pakhat a a senso atan cheng nuai khat bituk a ni.**
- 2. Art & Culture Minister Pu C. Lalsawivunga'n Zo hnahthlak peng hrang hrangte chu chenna hmun dang mahse unauna erawh a ngai reng tih sawiin then hran theih an nilo tih a sawi.**
- 3. Vawiin hian rampumah Muslim te sakhaw ni pawimawh Eid-ul-Fitr hman a ni dawn**
- 4. Sawrkar laipui chuan ramchhunga tuialhthei thlitfimna hmunten harsatna awm loin dan panngaiin hna an thawk a, tuialhthei mamawh khawp a awm tih a sawi.**

<><><>

AMC ELECTION EXPENDITURE

Mizoram State Election Commission thuchhuakin a tarlan danin, Aizawl Municipal Corporation inthlanna neih turah candidate pakhat-in ward pakhat a a senso atan cheng nuai khat bituk a ni.

AMC inthlan lo awm turah hian sum hman dan chungchang vil tur leh buaipui tur Expenditure Observer atan Pi Malsawmdawngliani, Director Local Fund Audit& Pension chu ruat a ni a, Expenditure Observer bakah Aizawl Municipal Corporation inthlan atan vek hian State Level Nodal Officer, Expenditure Monitoring hna hmui tel tura tih a ni bawk. Mizoram State Election Commission thuchhuakah hian Expenditure Observer kaihhruaina hnuaiiah Expenditure Monitoring Team te chuan candidate tinte inthlan senso reng reng uluk takin an vil dawn a ni.

Mizoram State Election Commissioner Dr. H Lalthlangliana sawi danin, tun tum Aizawl Municipal Corporation inthlan ward 19 a neih tur vil tur hian returning officer pali ruat an ni a, an ni bakah hian General Observer pali leh Model Code of Conduct Nodal Officer pakhat ruat a ni bawk.

<><><>

TEACHER'S QUARTER DATA

Mizoram sorkar chhinchhiah danin, kum 2024- 2025 inkara SASCI sum hmuh atangin Mizoram chhungah zirtirtu quarter 62 sak a ni.

School Education Department chhinchhiah danin, zirtirtu quarter hi Aziawl district-ah Zohmun, Palsang, Chawilung, Lamchhip, Thingsat, Samlukhai, New Vervek leh Tlungvelah te sak a ni a, Champhai district-ah Vaphai, Hnahlan, Kel kang, Champhai Zote, Vangchhia leh Thekpui-ah te sak niin Hnahthial district-ah Lungpuitlang, Chawngtui South, Aithur leh Lungleng South-ah te sak a ni bawk.

Special Assistance to State for Capital Investment, SASCI sum hmang hian Khawzawl district-a Vankal, Tlangpui, Tlangmawi, leh Hmuncheng khuaah te pawh zirtirtu quarter hi sak a ni a, Kolasib district-a North Chaltlang, Thinghelh, South Chhimluang, North Chawnpui leh Saiphai khua te bakah, Lawngtlai district chhunga Darnamtlang, Saikhawthlir, Tuidangtlang leh Chamdurtlang khuaah te sak a nih bakah, Lunglei district-a Tlabung, Runtung, Sairep, Mualthuam South, Chithar leh Serte khuaah te zirtirtu quarter hi sak a ni bawk.

SASCI sum hmang hian Mamit district chhunga khaw pariat Bawngva, Thinghlun, West Bunghmun, Hriphaw, Zawlpui, Belkhai, West Serzawl, leh Kanghmunah te zirtirtu quarter hi sak a ni bawk a, Saitual district chhunga Daido, Zawngin, North Lungpher, Tualbung, Thanglailung, Maite, Tawizo, leh Lenchim khua bakah, Serchhip district-a Neihloh, Bawktlang, Sailulak, Sialsir bakah Zote South khua ah te Siaha district chhunga New Laty, Tipa leh Amobyu-ah te zirtirtu quarter hi sak a ni bawk. Heng zirtirtu quarters sakna atana suam hman zat hi cheng 306,373,412.00 ni a tarlan a ni bawk.

<><><>

WEATHER

Tunhnaiah ruah tam tham tak bakah thli thawk thei anih avangin India Metereological Department, Aizawl chuan mipuite fimkhur turin a hriattir.

Akashvani News Aizawl zawhna chhangin India Metereological Department, Aizawl Director Pu Sudhir Kumar Dwivedi chuan Mizoram District hrang hrangah ruah tam tham tak bakah thli na tak tleh thei anih avangin mipuite fimkhur a tul thu a sawi a, chhuak tam lo tur leh thingkung bul hnaiah awm tam lo tura chah in leimin thei lakah fimkhur turin a chah a ni.

Nimina ruah tam tham tak sur avang hian thlawhna pawh cancel nual a ni a, Lengpui Airport hotute sawi danin Mizoram pan thlawhna 3 cancel ani tih sawiin heng hi Delhi thlawhna 2 leh Kolkata thlawhna 2 anih thu an sawi a ni.

<><><>

THANGRAM CULTURAL MEET

Art & Culture Minister Pu C. Lalsawivunga'n Zo hnahthlak peng hrang hrangte chu chenna hmun dang mahse unauna erawh a ngai reng tih sawiin then hran theih an nilo tih a sawi.

Minister hian khan Ronpur, Assam-a Thangram Cultural Meet-2026 Thangram Indigenous People Movement leh Mizo Zirlai Pawl te'n an buatsaih a hmanpui a, Zo hnahthlak peng hrang hrangte chu chenna hmun dang mahse inunauna erawh a ngai reng tih sawiin then hran theih annilo a ti a, Mahni awmna hmunah India khua leh tui tha ni tur leh midangte tana hnawklo tura

khawsak tum tura chahin boruak muanawm tak hnuaia hun an hmang thei chu lawmawm atih thu a sawi bawk.

Minister chuan Thangram Cultural meet chuan Thangram chhehvela cheng Zofate inlungrealna tha leh zual thlen se a duh thu sawiin, Mizo hnam ziarang vawng nung zel chungin Zonun zemawi tlawmngaihna, aia upate zahna, hawihhawmna chhawm zel tur leh Mizo an nihna inhrereng chungamawi taka khawsa turin kalkhawmte a chah a ni.

Adviser to CM Pu Lalmuanpuia Punte pawhin thusawiin insuihkhawm lehna tura ram hruiatu, tlawmngaipawl hrang hrang kaltlanga hmalakna-ah hmasawna hmuh ani tih sawiin engtik hunah emaw ram khatah inlungreal takin an la khawsa ho dawn tih a sawi bawk.

Thangram Cultural Meet hmanna hi Ronpur Assam-ah neih a ni a, Kum 2021 khan Cultural Meet hi lo neih a ni tawh bawk. Helai chhehvelah hian Chorei, Sakachep, Hrangkhawl, Ranglong, Molsom leh Kaipeng te an cheng a ni.

<><><>

AI WORKSHOP

Mizo Aw pawl hmalakna in “AI hmanga Mizo tawng humhalh” tih thupui zirhona leh hemi atana hna thawktur zawna chu nimin khan Mizoram University Guest House Conference Room ah buatsaih a ni.

He workshop hi Artificial Intelligence (AI) hmanga Mizo tawng vawn him leh humhalh dân zirna atan leh a tawngkai dân sawihona atan a buatsaih a ni a, Chief Guest Mizoram University Registrar Prof. Lalnundanga chuan tunlai khawvel thang zel ah Linguistic department pawimawh zia sawiin, MZU ah a awm ngei nan hma a lak zel tur thu a sawi a. Tawng humhalh pawimawh zia sawiin regional language chu central lam pawhin an rawn ngai hlua, chawikan a pawimawh zia hria in hma an rawn la a, hemi avang hetiang lam kawng zir bingna a awm a tul thu sawiin tawng humhalh kawng ah ngaihtuahna zau zawk leh thuk zawk a tuh a beisei thu a sawi.

Resource Person Dr. Lalnunthangi Chhange, chuan Linguistics subject leh Technology inkungkaihna chungchang sawiin, enchinna nen zirtirna hun a hmang a, He workshop ah hian mithiam rual ten AI tools technical demonstration hun hmangin, AI siam dawna Mizo tawng dik tak hman a tul zia te sawi ho a ni bawk.

<><><>

KVK SIAHA

Krishi Vivyan Kendra, Siaha District buatsaihin nimin khan Strawberry Festival cum Awareness programme on Bhumi Suposhan and Samrakshan Jan Abhiyan hman a ni.

Nimina hun hmanah hian Noatlah Bialtu MDC Pu N. Lalrosanga chuan khuallian niin a hmanpui a, KVK Siaha District-a thawktute leh kuthnathawktute thawrimna leh tanrualna zarah Strawberry kut hman a ni chu lawmawm a tih thu sawiin, Mizoramah Strawberry chanchin sawi anih chuan Noatlah khúa sawi lan ngei a ngai tawh tiin thar tam bêr an nih bakah ching hlawhtling ber anni a ti a, Mahni duhdan anga thei leh thlaite chin leh

enkawl aichuan mithiamte thurawn anga hma lâk anihin tharchhuah a tam tih sawiin kut hnathawktute chu mi thiamte räwn hreh lo tur leh an thurawn zawm kawngah thuawih taka awm tûrin a chah a ni.

Niminah hian mithiam hrang hrang hnen atangin Strawberry chin leh enkawl dan ngaihthlak a ni a, Pi C Racheli chuan strawberry chin leh enkawl dan sawiin Pu Isaac Lallawmkima chuan Bhumi Suposhan leh Samrakshan Jan Abhigan chungchangah zirtirna a pe bawk.

Kûtah hian Mizoram sawrkar leh MADC sawrkara mi pawimawh bakah khawtlâng hruaitute leh kut hnathawktute an tel a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

HANDLOOM EXPO

Handloom Expo (Heritage on the loom) Millenium Centre Rooftop ah neih mek a ni.

Handloom Expo ah hian dawr 30 a awm a. Heng dawr 30 zinga 20 ah hian Puantahtu Pehchan Card nei ngei ten an thil siam chhuahte an pho chhuak a. Kut them thiamna lam thil siam tan dawr 10 hawn a ni bawk. Expo hi Office of the Development Commissioner for Handlooms, Ministry of Textiles, Govt. of India, Weavers Service Centre, Ministry of Textiles, Aizawl leh Commerce & Industries Dept te tangkawpin an buatsaih niin ni 7 chhung aw haw tur a ni a, March 25 thleng hawn a ni ang. Handloom Expo ah hian Arunachal Pradesh, Assam leh West Bengal atanga lo kal ten an thil siam an pho chhuak ve bawk.

<><><>

EID

Vawiin hian rampumah Muslim te sakhaw ni pawimawh Eid-ul-Fitr hman a ni dawn a. Hmun hrang hrang Eid puala intawhkhawm leh tawngtaina hun hman a ni ang. Vawiin hi thla thianghlim Ramadan kharna tur niin hlim leh lawm takin Eid hmanga khar a ni ang.

President Drouapadi Murmu-i chuan ramchhung khua leh tuite Eid-ul-Fitre duhsakna chibai a buk a. President Murmu chuan Eid chuan mahni inthununna, midang tana malsawmna leh mi retheite lainatna kut a ni a ti a. Eid ah hian mitin malsawmna an dawn theihna tur chu a pawimawh atih thu sawiin tanpui ngaite tanpui tur leh inpumkhatna leh inunauna atana theithawp chhuah zel turin mitin a sawm a ni.

<><><>

OIL

Sawrkar laipui chuan ramchhunga tuialhthei thlitfimna hmunten harsatna awm loin dan panngaiin hna an thawk a, tuialhthei mamawh khawp a awm tih

a sawi. Nimina New Delhi-a West Asia indona chungchanga Inter-Ministerial briefing ah Union Petroleum and Natural Gas Ministry Joint Secretary Sujata Sharma chuan he thu hi sawiin Domestic LPG siamchhuah pawh a pangngai anih thu leh mamawh khawp a awm thu a sawi a. Joint Secretary chuan premium petrol man tlema tihsan a nih thu a sawi bawk.

External Affairs minister Randhir Jaiswal chuan India mi 913 chu Armenia-Azerbaijan kawngah thiarchhuah tawh an ni a ti a. Iraq atanga MT Safeea Vishnu lawng atanga channchhuah India mi 15 chu him takin India hruai thlen an ni a ti bawk.

<><><>